

ՀԱՍՏԱՏՈՒՄ ԵՄ՝
Հայաստանի պետական տնտեսագիտական
համալսարանի ռեկտոր պրոֆեսոր Պ. Գալոյան



27 ապրիլի 2023թ.

ԿԱՐԾԻՔ

Արմինե Վարդանի Գևորգյանի «Ներդրումների ներգրավման հիմնախնդիրները հետպատերազմյան Հայաստանում» թեմայով ատենախոսության վերաբերյալ, ներկայացված Ը. 00.02-«Տնտեսության, նրա ոլորտների տնտեսագիտություն և կառավարում» մասնագիտությամբ տնտեսագիտության թեկնածուի գիտական աստիճանի հայցման վերաբերյալ:

Ատենախոսությունը քննարկվել է Հայաստանի պետական տնտեսագիտական համալսարանի Մակրոէկոնոմիկայի ամբիոնի 25 ապրիլի 2023թ-ի N 11 նիստում:

ԱՏԵՆԱԽՈՍՈՒԹՅԱՆ ԹԵՄԱՅԻ ԱՐԴԻԱԿԱՆՈՒԹՅՈՒՆԸ

Ներդրումների ներգրավումը հետպատերազմական Հայաստանում ունի որոշակի առանձնահատկություններ, որոնք դրսևորվում են տնտեսական, իրավական և քաղաքական հարթություններում: Հատկանշական է, որ այդպիսի խնդիրներ ի հայտ են եկել հետխորհրդային ամբողջ ժամանակահատվածում, քանի որ պատերազմական իրավիճակներ եղել են ոչ մեծ պարբերականությամբ: Հեղինակն այդ խնդիրները ներկայացրել է նաև ՀՀ և նախկին ԽՍՀՄ հանրապետությունների միջև ձևավորված տնտեսական հարաբերությունների խզմամբ: Բացի այդ, հետխորհրդային Հայաստանում մեծ թափով տեղի ունեցավ պետական ձեռնարկությունների մասնավորեցման գործընթաց, որը նույնպես առաջ բերեց ներդրումների ներգրավման հետ կապված խնդիրներ՝ հանգեցնելով հետպատերազմական ժամանակաշրջանի հետ կապված նոր ուսումնասիրությունների:

Հեղինակն աշխատանքի արդիականության հիմնավորման շրջանակում անդրադարձել է զարգացող և զարգացած երկրների արտաքին տնտեսական

հարաբերությունների հիմնախնդիրների հետպատերազմական իրավիճակներին, դրանց համատեքստում կենտրոնանալով ներդրումների ներգրավման դրական և բացասական կողմերին:

Ատենախոսության մեջ կատարված հետազոտությունների շրջանակը թեմայի արդիականության հիմնավորման առումով ընդգրկում է նաև ֆինանսաբանկային ոլորտը, որտեղ հեղինակն իր դիտարկումներն է ներկայացրել պետական բանկերի բացակայության, ներքին ֆինանսական ռեսուրսների անբավարարության, արտաքին ֆինանսական աղբյուրների ոչ հուսալի հանգամանքների տեսանկյունից:

Աշխատանքի բաղկացուցիչ մասերից է ռազմական իրավիճակների պայմաններում օտարերկրյա ներդրումների ներգրավման միջազգային փորձի ուսումնասիրությունը և դրանց տեղայնացման հնարավորությունները Հայաստանի Հանրապետությունում, որը հատկապես կարևորվել է տնտեսության իրական հատվածի համար:

Հեղինակը թեմայի արդիականությունը հիմնավորել է նաև ՀՀ գյուղերի և գյուղատնտեսության զարգացման անհրաժեշտության, արդյունաբերության ցածր մակարդակի, և ՀՆԱ-ի հիմնական մաս կազմող ծառայությունների ոլորտի համատեքստում:

Վերոնշյալ հարցերին վերաբերող քննարկումները ներկայացված են Ը.00.02 «Տնտեսության, նրա ոլորտների տնտեսագիտություն և կառավարում» մասնագիտությամբ տնտեսագիտության թեկնածուի գիտական աստիճանի հայցման համար ներկայացված Արմինե Վարդանի Գևորգյանի ատենախոսության մեջ, որով էլ պայմանավորված է թեմայի արդիականությունը:

ՀԵՏԱԶՈՏՈՒԹՅԱՆ ՆՊԱՏԱԿԸ ԵՎ ԽՆԴԻՐՆԵՐԸ

Ատենախոսության մեջ նպատակ է դրվել վերլուծել ներդրումների ներգրավման հիմնախնդիրները հետպատերազմական Հայաստանում և առաջարկել ՀՀ ներդրումային գրավչության աճին ուղղված քայլեր՝ ինչպես ներդրումային գրավչություն

ունեցող ոլորտների բացահայտման, այնպես էլ ներդրումային քաղաքականության գործիքակազմի մշակման միջոցով:

Այդ նպատակին հասնելու համար դրվել և լուծվել են հետևյալ խնդիրները.

- Քննարկել ներդրումների ներգրավման հիմնական տեսությունները՝ ներկայացնելով դրանց օրինաչափություններն ու բացթողումները:
- Մասնագիտական գրականության և տարբեր հեղինակների կեղմից կատարված հետազոտությունների համադրման արդյունքում վեր հանել ներդրումային միջավայրի ձևավորման և ներդրումների ներգրավման վրա ազդող հիմնական գործոնները:
- Բացահայտված գործոնների միջոցով համեմատական վերլուծություն իրականացնել Հայաստանի, հարևան և ԵԱՏՄ երկրների ներդրումային միջավայրի համար՝ բացահայտելով ՀՀ ներդրումային դաշտի թերությունները:
- Քննական վերլուծության ենթարկել ՀՀ ՕՈՒՆ դինամիկան և կառուցվածքը՝ բացահայտելով առկա խնդիրները:
- Էկոնոմետրիկ գործիքակազմի միջոցով հաշվարկել ՕՈՒՆ ազդեցությունը ՀՀ տնտեսական աճի վրա և պարզել ՕՈՒՆ և ՀՆԱ միջև պատճառական կապի առկայությունը կամ բացակայությունը:
- Բացահայտել ՀՀ տնտեսության ներդրումային գրավչություն ունեցող ոլորտները՝ փաստաթղթային ստուգման և տարբեր ինդեքսների հաշվարկման հիման վրա:
- Վերլուծել ՀՀ-ում վարվող ներդրումային քաղաքականությունը՝ վեր հանելով դրանում առկա սխալներն ու բացթողումները:
- Մշակել հետպատերազմյան Հայաստանում ներդրումների ներգրավմանն ուղղված ռազմավարական քայլերի համախումբ, որը կներառի մինչ այդ արձանագրված խնդիրների լուծման գործիքակազմ:

ԱՏԵՆԱԽՈՍՈՒԹՅԱՆ ՀԻՄՆԱԿԱՆ ԱՐԴՅՈՒՆՔՆԵՐԸ ԵՎ ԳԻՏԱԿԱՆ ՆՈՐՈՒՅԹԸ

Ատենախոսությունում ստացվել են գիտական նորոյթ պարունակող հետևյալ դրույթները.

1. Բազմագործոն ռեգրեսիոն էկոնոմետրիկ մոդելների կիրառմամբ բացահայտվել է Հայաստանի Հանրապետությունում ՕՈՒՆ-երի ազդեցության գործակիցը ՀՆԱ-ի աճի ձեռքբերման գործում, ինչպես նաև ցույց է տրվել ՕՈՒՆ-երի և ՀՀ ՀՆԱ-ի միջև առկա պատճառական կապը: Ըստ այդմ՝ տվյալ ժամանակահատվածում ՕՈՒՆ ներհուքի փոփոխությունը պատճառ է հանդիսանում հետագա 6 ամիսների ընթացքում ՀՆԱ-ի փոփոխության, իսկ տվյալ ժամանակահատվածում ՕՈՒՆ միավոր աճը նպաստում է ՀՀ ՀՆԱ-ի աճին 1,56 միավորով:
2. Մշակվել են հետպատերազմյան Հայաստանում ներդրումների ներգրավման համար անհրաժեշտ ռազմավարական քայլեր, որոնք բաղկացած էին 3 համախմբից՝ 1. մեթոդական գործիքակազմ, որը պետք է հաշվի առնվի ՀՀ ներդրումների ներգրավման ռազմավարություն մշակելիս, 2. ներկայում ՀՀ-ում ներդրումային քաղաքականության իրականացման ընթացքում թույլ տված սխալների և թերացումների շտկմանն ուղղված գործիքակազմ, 3. մասնագիտական գրականության և տարբեր հեղինակների կողմից կատարված վերլուծությունների համադրման արդյունքում վեր հանված ներդրումային գրավչության վրա ազդող 30 գործոններից բաղկացած համախմբի այն գործոնների մտկմանն ուղղված գործիքակազմ, որոնց մասով Հայաստանը զիջում էր հարևան և ԵԱՏՄ երկրներին:
3. Բացահայտվել են ՀՀ-ում ներդրումային գրավչության և ներդրումային ներուժ ունեցող ոլորտները՝ 4 մեթոդաբանությունների համադրման հիման վրա՝ փաստաթղթային վերլուծություն, պետական կառավարման համակարգում անցկացված սոցիոլոգիական հարցումներ, արտահանման բացահայտ համեմատական առավելություն ունեցող ոլորտների բացահայտում և ՕՈՒՆ կանոնակարգման սահմանափակման ինդեքսի համեմատական վերլուծություն:

ԱՏԵՆԱԽՈՍՈՒԹՅԱՆ ԳԻՏԱԳՈՐԾՆԱԿԱՆ ԵՎ ԿԻՐԱՌԱԿԱՆ ՆՇԱՆԱԿՈՒԹՅՈՒՆԸ

Ատենախոսությունում ստացվել են ինչպես տեսական, այնպես էլ կիրառական նշանակություն ունեցող դրույթներ: Ատենախոսության տեսական հիմնադրույթները կարող են կիրառվել այլ հետազոտողների կողմից, ինչպես նաև օգտագործվել ներդրումների ներգրավման առարկայական ծրագրում, իսկ կիրառական նշանակության դրույթների հասցեատերը հիմնականում ՀՀ կառավարությունն է: Մշակված գործիքակազմը կարող է նպաստել Հայաստանում վարվող ներդրումային քաղաքականության բարելավմանը:

ՀԵՏԱԶՈՏՈՒԹՅԱՆ ԿԱՌՈՒՑՎԱԾՔԸ ԵՎ ԾԱՎԱԼԸ

Աշխատանքը կազմված է ներածությունից, երեք գլուխներից, եզրակացությունից, օգտագործված գրականության ցանկից և հավելվածից: Այն շարադրված է 125 մեքենագիր էջի վրա՝ առանց հավելվածի, պարունակում է 36 գծապատկեր, 20 աղյուսակ:

ԱՏԵՆԱԽՈՍՈՒԹՅԱՆ ՀԻՄՆԱԿԱՆ ԲՈՎԱՆԴԱԿՈՒԹՅՈՒՆԸ

Աշխատանքի առաջին՝ «Ներդրումների ներգրավման տեսական հիմնադրույթները» գլխում հեղինակն անդրադարձել է ներդրումների ներգրավման հիմնական տեսություններին և դրանց վրա ազդող գործոններին: Կատարվել են էմպիրիկ վերլուծություններ, իսկ ներդրումային միջավայրի վրա ազդեցությունը ներկայացվել է ինստիտուցիոնալ, տնտեսական, սոցիալ-ժողովրդագրական գործոնների տեսքով:

Ատենախոսության երրորդ՝ «ՀՀ ներդրումների ներգրավման հիմնախնդիրները» գլխում ներկայացվել է ՀՀ ՕՈՒՆ կառուցվածքը և ազդեցությունը ՀՆԱ-ի վրա, ինչպես

նաև կատարվել է ՀՀ ներդրումային միջավայրի համեմատական վերլուծություն: Համաձայն աշխատանքի մեջ կատարված վերլուծության, տնտեսական ցուցանիշներից ներդրումների ներգրավման վրա դրական են ազդում ՀՆԱ-ի աճը, ՀՆԱ-ի դեֆլյատորը, մյուս գործոնների ազդեցությունը վիճակագրորեն նշանակալի չի եղել: Իսկ սոցիալ-ժողովրդագրական գործոններից գործազրկության աճը բացասաբար է ազդել ներդրումների ներհուսքի վրա:

Հետազոտության երրորդ՝ «Ներդրումների ներգրավման հնարավորությունները հետպատերազմյան Հայաստանում» գլխում իրականացված հիմնական աշխատանքները վերաբերել են ՀՀ-ում ներդրումների համար նպաստավոր ոլորտների բացահայտմանը և ՀՀ ներդրումների ներգրավման համար անհրաժեշտ ռազմավարական քայլերին: Դրանց համաձայն ատենախոսը հիմնավորել է ներդրումային գրավչություն ունեցող այն ոլորտների առկայությունը, որոնք ընկալելի կլինեն առաջիկա տարիներին, բացի այդ, բացահայտվել է նաև արտաքին շուկաներում համեմատական կամ մրցակցային առավելություն ունեցող ոլորտները:

Աշխատանքի «Եզրակացություն» բաժնում ամփոփվել են հետազոտության հիմնական եզրահանգումները, որոնք բխում են կատարված ուսումնասիրություններից և իրականացված վերլուծություններից:

ԴԻՏՈՂՈՒԹՅՈՒՆՆԵՐ ԱՏԵՆԱԽՈՍՈՒԹՅԱՆ ՎԵՐԱԲԵՐՅԱԼ

Ատենախոսության մեջ կան որոշակի թերություններ, որոնք հրավիրում ենք հեղինակի ուշադրությանը:

1. Հեղինակը մշակել է էկոնոմետրիկ մոդելներ, որոնց միջոցով գնահատել է ՕՈՒՆ-երի աճի տեմպի, արտահանման աճի տեմպի, ներմուծման աճի տեմպի ազդեցությունները ՀՀ ՀՆԱ-ի(անվանական)աճի տեմպի վրա: Օգտագործվել են 2010-2021թթ.եռամսյակային շարքեր: Կարծում ենք, որ ՀՀ ՀՆԱ-ի աճի վրա ազդեցության գործակիցներն ավելի ստույգ կստացվեին, եթե հեղինակը վերցներ

տվյալների ավելի մեծ բազա: ՕՈՒՆ-երի (զուտ պարտավորությունների ստանձնում), ապրանքների և ծառայությունների արտահանման և ներմուծման վերաբերյալ ՀՀ վճարային հաշվեկշիռ 6-ում (որին հեղինակը հղում կատարել է) շարքերն 1995թ-ից առկա են: Եռամսյակային տվյալների ավելի երկար շարքերը հնարավորություն կտային գնահատումներ կատարել ՀՀ տնտեսության համար նշանակալի ներքին և արտաքին շուկերի պայմաններում:

2. Ցանկալի կլիներ, որ հեղինակը գնահատեր նաև համախառն ներքին ներդրումների (համախառն կուտակում) աճի տեմպի ազդեցությունը ՀՀ իրական ՀՆԱ-ի աճի տեմպի վրա:
3. Հեղինակը կատարում է ՀՀ ներդրումային գրավչության համեմատական վերլուծություն և բացահայտում է, որ և՛ հարևան երկրների, և՛ ԵԱՏՄ անդամ երկրների համեմատությամբ ՀՀ տնտեսությունը օտարերկրյա ներդրողների համար քիչ գրավիչ է: Մյուս կողմից էլ հեղինակի կողմից կատարված տնտեսաչափական գնահատման արդյունքները վկայում են, որ արտահանման աճի տեմպը մեծ ազդեցություն ունի ՀՀ ՀՆԱ աճի տեմպի վրա: Միջազգային փորձի ուսումնասիրությունը փաստում է, որ մի շարք հետպատերազմյան երկրների (Գերմանիա, Ճապոնիա) տնտեսական հրաշքի մաս են կազմել արտահանման աճին, ներմուծման փոխարինմանը միտված ներդրումային քաղաքականությունները: Ցանկալի կլիներ, որ հեղինակն ուսումնասիրեր առաջիկա 10 տարիների կտրվածքով ՀՀ-ում բացահայտված ներդրումային գրավչություն և ներուժ ունեցող ոլորտներում կառավարության խթանող ներդրումային քաղաքականության միջոցառումները՝ հարկային արձակուրդների, հարկային վարկի տրամադրման շրջանակներում, և հանդես գար առաջարկություններով:
4. Առաջին գիտական նորույթի հիմնավորումները թույլ են, քանի որ հեղինակը ներկայացրել է պարզապես ռեգրեսիոն հավասարում՝ որպես վերլուծական գործիք, որով փորձել է ցույց տալ ներդրումների և ՀՆԱ-ի միջև կապը:

5. Երկրորդ գիտական նորոյթն ավելի շատ նման է առաջարկության և կարիք ունի խմբագրման՝ որպես նորոյթ դիտարկվելու նպատակով: Այսինքն ռազմավարական քայլերը որպես նորոյթ կարելի է համարել շատ ավելի խոր գիտավերլուծական հիմնավորումների պարագայում:
6. Աշխատանքի մեջ առկա են նաև տեխնիկական թերություններ: Մասնավորապես, կան տառասխալներ էջ 43-ում, 45-ում, կրկնվող բառեր էջ 70-ում և այլն: Տիտղոսաթերթի վրա գրված է Երևան 2022: Նոր պարբերություն սկսելու սկզբունքները տարբեր էջերում տարբեր են:

ԵԶՐԱԿԱՅՈՒԹՅՈՒՆ

Նշված դիտողություններն էական բացասական ազդեցություն չունեն հետազոտության արդյունքների տեսական և կիրառական նշանակության վրա:

Արմինե Վարդանի Գևորգյանի «Ներդրումների ներգրավման հիմնախնդիրները հետպատերազմյան Հայաստանում» թեմայով թեկնածուական ատենախոսությունը ինքնուրույն և ամբողջական հետազոտություն է, որում դրված նպատակը և խնդիրների լուծումը ՀՀ ներդրումային քաղաքականության ու այդ ոլորտում իրականացվող միջոցառումների համատեքստում ունեն խթանիչ դեր:

Հետազոտության հիմնական արդյունքները հրապարակվել են 7 գիտական հոդվածներում: Ատենախոսության սեղմագիրը համապատասխանում է աշխատանքի բովանդակությանը և արտացոլում է հետազոտության կարևոր դրույթներն ու արդյունքները:

Այսպիսով, Արմինե Վարդանի Գևորգյանի «Ներդրումների ներգրավման հիմնախնդիրները հետպատերազմյան Հայաստանում» թեմայով թեկնածուական ատենախոսությունը համապատասխանում է ՀՀ «Գիտական աստիճանաշնորհման կանոնակարգի» 6-րդ և 7-րդ կետերին, ինչպես նաև ՀՀ ԲՈԿ-ի կողմից թեկնածուական ատենախոսություններին ներկայացվող պահանջներին, իսկ հեղինակն արժանի է

Ը.00.02 «Տնտեսության, նրա ոլորտների տնտեսագիտություն և կառավարում»
մասնագիտությամբ տնտեսագիտության թեկնածուի գիտականի շնորհմանը:

Տնտեսագիտության թեկնածու, դոցենտ
Մակրոէկոնոմիկայի ամբիոնի վարիչ՝



Սոս Խաչիկյան

Մակրոէկոնոմիկայի ամբիոնի դոցենտ,
Տնտեսագիտության թեկնածու, դոցենտ



Ռուբեն Ղանթարյան

Մակրոէկոնոմիկայի ամբիոնի դոցենտ,
Տնտեսագիտության թեկնածու, դոցենտ



Վարսիկ Տիգրանյան

Ստորագրողները հաստատում են՝
ՀՊՏՀ գիտական քարտուղար



Ռուբեն Ղանթարյան

27.0

